

Sier Marco Minio fo savio del Conseio,
qu. sier Bortolomio 67.134

Et cussì non passò niun. E questa è la seconda volta è stà fato, et niun ha passato, ch'è mal signal a la patria nostra, che non se voi andar a servir. Et sier Marco Foscarei fa grandissime procure che non se voi; et a l'incontro sier Francesco Pasqualigo et sier Zuan Emo et sier Zuan Francesco Badoer procurano apertamente.

Noto. È stà conduto in questa terra, per deliberation del Conseio di X, sier Zuan Tiepolo, qu. sier Marco, era in el castel de Ravena con compagni..... per castellan, el qual è venuto in questa terra, et fo mandato Andrea Vasallo in roca in suo loco. Et questo stete in caxa de Andrea Vechia capitanio del Conseio di X, con custodia.

326 *A dì 15 Zugno, marti, fo San Vido.* Fu fato la procession justa el solito a San Vido, et poi andò il Serenissimo, vestito di restagno d'oro et bareta de raso cremexin, con le cerimonie ducal. Erano oratori, Franza, zoè domino Zuan Joachin, Ingàltera, Milan, Fiorenza et Ferrara. Il legato era in padoana. *Solum* tre consieri, et niun procurator. Portò la spada sier Zuan Dolfìn va capitanio a Bergamo, in veludo cremexin alto et basso. Fo suo compagno sier Marco Barbarigo qu. sier Andrea in veludo negro. Era *etiam* do forestieri (*invidadi*) a disnar col Serenissimo apresso sier Marco Malipiero censis, i qual sonò Et poi . . . di XL eriminal et li proveditori sora le legne et oficali a la becaria ch'è insoliti a invidar, et de fuora via do nepoti del Serenissimo, sier Alvise Salamon qu. sier Francesco, sier Carlo Ruzini qu. sier Domenego, invidati al pasto di soa serenità.

La terra, di peste, heri uno, loco novo, et 7 de altro mal.

Da Crema, vidi lettere, di 13, venute questa matina, qual dice cussì: De novo habbiamo che 'l signor duca de Urbino prima, et poi monsignor de San Polo sono stati separatamente a Lodi a visitation de lo illustrissimo duca de Milano, et l'hanno confortato et datoli bona speranza de haver Milano. Et hozi monsignor de San Polo con le sue zente dovea conzonzerse con le nostre per andar soto Milano. Il clarissimo provedador Nani ha scritto de qui se prepari de mandar el ponte a Cassan, el qual farà meter in aqua in quello se meterano soto Milan, che sarà fra do zorni. In Lodi sono avisi di Zenoa, di 8 de l'istante, che 'l Doria era ancora a Zenoa, et non era expedito; et che pur alhora el

facea far el biscotto, et molti erano dubiosi de la venuta de l'imperador. Et che se dicea che se 'l non venirà, et che se habbia Milano, *immediate* zenoesi patizerano *cum* francesi. In Milano se intende esser fanti 4200, zoè 800 spagnoli venuti ultimamente, et 4000 de vechi. *Item*, fanti 1500 italiani et lanzinech 1500; et che patisseno del viver talmente, che Antonio da Leva facea tuor di castello el vin de la monition, qual dava a li soi soldati. In campo de francesi zonzevano de hora in hora lanzinech 3000 venuti de Franza, li quali fono lassati li giorni passati a Verzelli. Se la liga starà ferma, non se pol sperar salvo di ben. *Item*, se ha 326* che è stà scontrato uno messo de Ferandino che andava in gran pressa a l'imperador, se judica, a rechiederli aiuto per causa de turchi.

Da Lodi, fo lettere di sier Gabriel Venier orator, di Manda la copia de una lettera intercepta a Rezo, di uno che scrive di Zenoa, et mandata a l'orator di Ferara, è a Lodi, per la qual par l'imperador non sii per venir in Italia.

Da poi disnar, vene *lettere da Fiorenza, di sier Carlo Capello orator, di 11, con avisi.* Come a dì 9 partite Andrea Doria con 13 galle et 4 nave per Spagna, sichè se pol reputar certa la venuta de l'imperator. Le qual galle se uirà con 5 de Napoli, et 3 nave erano partide per avanti, che summa numero 9 (*sic*); qual va a scontrar l'imperator. Et come in Zenoa si preparavano alozamenti et leti per tal venuta.

Di sier Polo Nani proveditor zeneral, da Marignan, di 13, hore Come per duplicati avisi et messi venuti di Zenoa *ut in litteris* hanno il partir a dì 9 de Andrea Doria con l'armata per Spagna per levar l'imperator; la qual armata sono galle in tutto 18 et 7 nave. Et in Zenoa se fa provision de alozamenti et preparar letti per la venuta de l'imperador de li.

Di sier Gabriel Venier orator, da Lodi, di 13. Come el duca de Milan voria la Signoria fusse contenta el seodesse l'intrade de l'Abazia di Ceredo, qual è ch'è sul cremasco, perchè quello è di là di Adda lui le scuode, et questo per pagar li fanti, che non è el modo de tenerli. Et questa lettera fo scritta a li Cai di X.

Queste lettere, poi il pranso, fo lete in tinello del Serenissimo, et per non esser secretari, sier Marin Justinian l'avogador de Comun le leze.

Da poi, reduti li Savi in Gran Conseio, le lexeno loro.